

Carta a los Filipenses

Kjibokwo ëre tara Pablorë Filipos sopga kong

Kjibokwo ëre sorë

Domer shäng kjłara ko Pablo. E Sbö tjłökwö łaga Jesús äska włeniyo. Dënashko ga Pablo öötong shäng Filipos kjokyo Silas, Timoteo tjok, Jesús roy pjłú łë. Eshko ga nopga ara omtjłökwö kjrono, tak pjang Hechos 16.12-40 go sorë łi eni. Pjłara ga Pablo sök kjërshko Roma kjokyo, Jesús roy pjłú łara kjışhko. Epga ommydonoshko ga łłëbo ichara łok ba kjimtokłö, dbur bakoe. Ichara łok domer kjłara ko Epafrodito tjok. E kjışhko ga kjibokwo ëre tara Pablorë, e beno wopjłú ba kong łi łokłö.

Eshkoshko ga Jesús tjłökwö kragaga łöng Filipos kjokyo łi shdungoba ara. Eni ga kjibokwo ëre go ga Pablo shdungoba ara ëmdë ga shäng wopjłú łi roy jyä tara, epga dbokjrë e go włö. Ga epga ichara ber łöng wotöshko, ga ëng kjimté kar kar bakoe.

Eshko dbaryo ga judıoga kjone kjone to łöng tjłë ga shji dăr włö ga woyde ga shji măr Jesús go dö łłëm, woyde ga kjok łlgwekkłö tara Moisésdë łi söy bakoe łë łöng eni, miga jyö erä. E kjışhko ga kjibokwo ëre go ga Jesús tjłökwö kragaga łi ichara Pablorë ber łöng sjëk, nopga eniyo tjok.

Kjibokwo ëre tara ba kongshko ga sök no shdüzłong uyo roshko Roma kjokyo, Jesús roy pjłú łara kjışhko, tak pjang Hechos 28.16-31 go sorë łi eni.

1 ¹Kjibokwo ëre taga tja Pablorë, Timoteo tjok. Tjawa Cristo Jesús parkaga. Sbö nopga tönö beno tjeng Cristo Jesús tjok łöng Filipos kjokyo, kjibokwo ëre ichërwa jek bomi kong, bomi kägäyoga kong, ëye parkë łöng bomi tjok łi kong bakoe.

²Rokër bi Data Sbö kong, Tjłapga Jesucristo kong ga ba wopjłú łi kjışhko ga pjäy kjimte łok ara, pjäy ie ber łöng włëp bakoe.

Pablo syöshtono Sbö kong Filipos sopga kjışhko

³⁻⁵Tja öör Jesús roy pjłú łë bomi kong dämärshko tek łëkong ga pjäy łöng parkë Jesús kong bor tjok pjłú iyado. E kjışhko ga pjäy woyotjłınshko ga tja wopjłú Sbö tjok, ga tja syöshtë ba kong bomi kjışhko wopjłúe. ⁶Sbö

tjłokwo pjłú li kjroromishko ga lłebo pjłú shäryara Sbörë bomi pjłúshko, ga miydër ga shärye jek këgong, äär jong Cristo Jesús tjwe iröng obi guing.

⁷Sbö wopjłú li kjřshko ga «Jesús roy pjłú li, e jlõe» lër to shäng tjłapgaga kësks bokshtoshko ga pjây iara Sbörë beno löng bor kjimtaga. Ga tja bängzak shäng ëreshko orkwo kjrochak pjir dröng sho goshko ga pjây löng bor kjimtë obi. E kjřshko ga pjây uunkong woydër ara. Eni kuzong ga tja wopjłú bomi kjřshko li, e pjłúe. ⁸Pjây uunkong in woydë ara, e miyde Sbörë pjire. Pjây woydër ara, shji woyde Cristo Jesúsde sorë ga eni.

⁹Tja syöshhtë Sbö kong bomi kjřshkoshko ga rokër ba kong ga pjây kjimte dbar kjwobi go oblë woydë jek këgong këgong. Rokër ba kong obi ga pjây opping jek këgong këgong ba kjok miydë li go, ba wotjłik pjłú li go bako, ¹⁰lłebo pjłú anmoyö li shäryëmi iyado wlo. Eni ga pjây ber löng pjlo bek, pogo lłeye dret Sbö bokso, äär jong Cristo tjwe iröng obi guing. ¹¹Ga rokër ba kong ga pjây kjimte Jesucristorë jëk löng pjlo bek iyado, pjây ikoba wlo, Sbö poshrëkoba bomi kjřshko wlo, Sbö iëba ber tjwlo ara anmoyö bomi kjřshko wlo bakoe.

Pablo sök kjërshko, Cristo tjłokwo roy pjłú le kjřshko

¹²Pjeyoga, lłeye weno bor kong dö li, e shäryono Jesús roy pjłú shdär jek këgong wlo. E lër bomi kong, miydëmi wlo. ¹³Eerishko ga no dagaga parkë löng no lłgwezlong uyo ëreshko, nopga oblë oblë, miyde lok ga tja iak shäng kjërshko orkwo kjrochak pjir dröng sho go, Cristo kjřshko. ¹⁴Bi pjeyoga lłamo löng kës li, tja roy kuya lok ga opyono mär löng Sbö tjłokwo roy le jlökoyo, lłeye bangkjre lok ame.

¹⁵⁻¹⁷No kjong kjong Cristo roy le wopjłú go. Shärye lok eni, tja woyde ara kjřshko. Miyde lok ga tja iak shäng ëreshko, «Cristo tjłokwo roy pjłú li, e jlõe» lër oba kong wlo. Gueniyo kjong kjongda omlë, gueniyo wotjłik löng oblë. Shärye löng eni, tja woyde lłëm kjřshko, äär ber tjwlo ara bor kjinmo wlo. Woyde lok ga songyo kjrër ara anmoyö ëreshko le. Miydër ga eni. ¹⁸⁻¹⁹Gueniyo ga e lłeye lłëme. Cristo roy, e le löng enido. Wotjłik pjłúre, de oware, gueniyo Cristo roy le löng enido. Tja wopjłú e kjřshko.

Lłebo weno bor kong owa ara ëre kjřshko ga pjây syöshhtë löng Sbö kong bor kjřshko ara, ga tja kjimte Jesucristo Sëyarë ara bakoe. E kjřshko ga miydër ga tja där, ga tja ber shäng wopjłú ara anmoyö e kjřshko. ²⁰Bor kong ga Cristo tjłokwo lłokyokjrër kjwe ga tja ber lok ara eshko. Woydër eni lłëme. Gueniyo miydër ga tja sgara shäng tjłë Cristo kjřshko sorë ga tja tjłë eni iyado, ikoba ga Cristo, e tjwlo ara lëba wlo. Woydër ga tja sök sëre, de tja zrörabare, lëba eni iyado. ²¹Bor kong ga tja beno shäng ga tja shäng lłebo shäryë Cristo kong wlo eröe. Ga tja wolono ga bor kong ga pjłú anmoyö. ²²Eni gueniyo ga tja sök kjok ëre kjing go obishko ga nopga kjimtër jek këgong ga pjłúe. ¿Woydër kjone dey yalë? Miydër lłëme. ²³Bor kong ga pjłúyo kjone dey lër ga kjange. Tja wotjłik kjrina ga tja wolon dey, tja to ber sök Cristo tjok wlo, e bor kong ga pjłú anmoyö. ²⁴Gueniyo tja wotjłik kjrina obi ga ber pjłú bomi kong wlo ga tja ber sök kjok ëre kjing go obi dey. ²⁵Miydër pjłú ga eni. E

kjishko ga miydër ga tja ber sök bomi tjok obi, pjây kjimtër mâr ber lõng Cristo go jek këgong wlo. Eshko ga pjây ber lõng wopjlú ara anmoyõ. ²⁶Ga tja sök bomi tjok obishko ga pjây lõng wopjlú Cristo Jesús tjok bor kjishko.

²⁷Llëbo wen bor kong sorë pogo ga Cristo roy pjlu li kjiroromi kuzong ga woydër ga pjây jëk pjlo bek e go, Cristo roy pjlu li tjwlo ara lëba wlo. Eni ga tja äär bomi ikde, de pjây roy kur eröre, miydër ga pjây lõng wotjlik kjirinaso, pjây lõng parkë uunkong no kjilaraso wleni, Cristo roy shdär oba uunkong kong wlo. ²⁸⁻²⁹Llëbo shäryara Sbörë bomi kong pjluë. Pjây iara beno lõng mâr Cristo go. Gueniyo erö llëme. Pjây iara beno shdungoba song ba kjishko bakoe. Era llëbo pjlu bomi kong bakoe. E kjishko ga bomi wloyoga, e bangkjreми sira llëme. E goshko ga miyde lok ga to jeno wlo, ga pjâyda dâr wlo. E laga Sbörë eni. ³⁰Dënashko ga tja shdunaba sorë li inomi welëe. Eerishko ga roy kumi lõng ga tja shdungoba shäng e kjoyo obi. Ga miydër ga shäryëba lõng bomi kong eni bakoe.

2 ¹Eni ga pjây tönö tjeng Cristo tjok kuzong ga pjây kong dbo twe iyado. Pjây woyde ara kjishko ga pjây woydë llëme. Sbö Sëya tjeng bomi tjok iyado. Pjây songe le Sbörë bakoe. ²Eni kuzong ga llëye lër bomi kong li shäryozia. Pjây wotjlis jong kjirinaso, llëye woyotjlimi kës li shäryëmi ga pjlu wlo. Pjây ëng woydos ara kar kar, pjây ber lõng ëng tjok wopjlú wlo. Shäryoromi eni ga tja ber wopjlú kësbang eshko. ³Pjây llëbo shäryë, pjây äär ber tjwlo ara wlo lëmi llëme. Pjây opyë tjwlo ara oblë kjinmo llëme. Oblë iozi ber tjwlo ara bomi kjinmo dey. Pjây ber wotöshko. ⁴Pjây llëbo wlek pjlu bomi kong dö llëme. Wlëzi ber pjlu oblë kong bakoe. ⁵Cristo Jesús, e wotjlik sorë ga pjây wotjlik eni bakoe.

⁶Kjok shäryayde Sbörë llëm obishko ga e Sbö jlökoyo, tjwlo baïya dik bakoe. Gueniyo ga «Tja ber sök jushko tjwlo ara iyado wlo» lara llëme.

⁷Opyono beno shäng tjwlo llëm,
parkaga tjwlëk shäng pjir wleniyo dik,
weno no, so shji kjoyoe.

⁸Eshko ga opyono beno shäng wotöshko anmoyõ.
Ba Data kolara kjishko ga

opyono beno wolon pjang kjlös go, nopga owa wleni.

⁹E kjishko ga iara Sbörë beno tjwlo ara anmoyõ,
oblëga kës li kjinmo.

¹⁰Shäryara eni, uunkong kjök tok ba kong wlo,
ëye lõng kjok dogo, ëye lõng kjok ëre kjing go, ëye lõng klung ëre
dorko bakoe.

¹¹Eshko ga «Jesucristo, e bi pjluyo jlöe» le lok uunkong.
Eni ga Data Sbö ber tjwlo ara bakoe.

Shji llëbo shäryë pjluë

¹²⁻¹³Pjeyoga, Sbö, e drön ëë bomi tjok, llëye le li shäryëmi eni wlo. Tja shäng bomi tjokshko ga tja koloromi pjluë. Era eerishko ga tja shäng pjola ga woyde ga pjây drön ëë, Sbö kolë, bangkjre iyado wlo. Pjây döra llëbo pjlu ëre kong wlo.

14-16 Lëye shäryëmi dö ga shäryozi löng wopjluë. Shji kjloshtë llëm, shji ëng dboryë kar kar llëm bakoe. Eni ga pjäy löng pjlo bek, pogo llëye dret Sbö bokso. Pjäy Sbö wapga tjän, pjäy löng nopga owa jëk löng pjlo bek llëm li tjëko gueniyo. E kjishko ga pjäy llëbo owa shäryë llëme. Eni ga shji ber löng së jlokooyo sorë tjlokwoyo li lëmi nopga kongshko ga pjäy iya lok ga oblë, dbala lok shjiy kjok ro si roshko wleni. Eni ga Cristo tjwe iröng obishko ga tja wopjlu bomi kjishko, pak shäryoror li beno tjwlo ara kjishko. 17 Pjäy mär löng Jesús go kjishko ga pjäy shdungoba löng songe. Ga miydër ga tja kjwe zrökoba, tjlokwö loror bomi kong kjishko. Eni ëmdë ga tja wopjluë. Tja wopjlu bomi kjishko bakoe. 18 Pjlu wlo ga llëye wen bomi kongshko ga pjäy löng wopjluë. Ga pjäy ber wopjlu bor kjishko bakoe.

Timoteo, Epafrodito

19 Pjäy roy miydër woydë, tja ber wopjlu wlo. E kjishko ga tja kjimte Tjlapga Jesüsdë ga Timoteo, e ichër jek maling bomi ik, pjäy roy söya bor kong wlo lër. 20 Lëbo ber pjlu bomi kong sorë li woyotjliya shäng jlokooyo iyado botoya dik. Eye oblë, pjäy woyotjliya eni llëme. 21 Llamö löng ëreshkora, llëbo baiya woyotjliye. Lëbo Jesucristo i, e woyotjliya löng llëme. 22 Gueniyo Timoteora parkë shäng bor tjok Jesús roy pjlu lë oba kong, wapga parkë löng ba data tjok sorë ga eni. E miydoromi tjän. 23 Eni ga ichër woydë jek bomi ik, tja därde, de tja där llëm, e miydoror guing. 24 Ga miydër ga tja kjimte Tjlapgarë wop ä ga jek bomi ik bakoe lër.

25 Bi kjlara Epafrodito, e ichoromi tek bor kong, tja kjimte bomi äska wlo. E parkono shäng bor tjok pjlu, dröno ara bor kjimtë Cristo roy lë. Gueniyo pjlu wlo ga ichër jek woydë bomi shwoy iröng obi. 26 Pjäy iya woydë araë. Miyde ga swlo ara roy kuromi, ga woydë ara e kjishko. 27 Öör buk swlo ara jloë. Woiono seke. Gueniyo songe lara Sbörë, ga kjimtara. Lëye shäryara ba kong li beno bor kong pjlu bakoe. Tja song iyado. E woiono kjwe ga tja beno sök woydë ara eshko. 28 E kjishko ga ichër jek woydë bomi shwoy maling, inomishko ga pjäy ber löng wopjlu obi wlo, tja sök woydë ba kjishko ame wlo. 29-30 Tja kjimtëmi om go ga ä kjishko ga shrono shäng na bor kjimtë bomi äska. Parkë shäng Cristo kong ëreshkoshko ga woiono seke. E kjishko ga jek öötong shäng bomi shwoyshko ga wlokjrozi löng wopjlu, bomi kjlara wleni. Eye parkë baiya dik ga bangkjrozi bakoe.

Shji mär Cristo Jesús go

3 1 Era eni ga pjeyoga, pjäy löng mär Tjlapga Jesús go kuzong ga pjäy ber löng wopjlu e go. Tjlokwö toror bomi kong li tër bomi kong jek obi. Tja kwleya ba të llëme. E ber bomi wlikoklo wleni.

2 Pjäy sjëk, nopga owa löng llëbo owa shäryë wleniyo tjok. Epga so shjiti kjloshko so kjoyoe. To löng tjle ga «Woyde ga shji opsho zë, shji ber jyä tak pjir Sbö i wlo» lë lok eni. 3 Miga jyö erä. Jyä tak pjir Sbö i jlokooyo li shji. Shji

kjimte ba Sëyarë ba poshrëk. Shji tōno beno tjeng Cristo Jesús tjok. Shji mār lēbo shāryëy om go li go lēme. Shji jyā tak pjir Sbō ī jļōkoyo e kjišhko.

⁴Shji dār lēbo shāryëy li go kjwe ga dār bām go li tja. Tja lēbo pjļū shāryono ara anmoyō, oblē kjinmo. ⁵Tja buk chirawa öötong dbar kjwongshko (8) ga tja doyo jyā taraba pjire. Tja Israel tjëyo, tja Benjamín tjëyo bakoe. Tja hebreo jļōkoyo tek dāmār dwayo. Dēnashko ga tja fariseo. E kjišhko ga tja jëk to shäng pjlo bek kjok lļgwekkļo tara Moisésdē li go. ⁶Tja parkē woydē Sbō kong jļōkoyo. E kjišhko ga Jesús tjļōkwo kragaga irpjanor, shdunor ara. Kjok lļgwekkļo li, e sōror beke. Tja lēbo owa shāryono lēba ga äe.

Shji Cristo miydē woydē pjļúe

⁷Dēnashko ga tja mār lēbo tjeng kēs ère go. Gueniyo eerishko ga tja mār shäng Cristo go shara. E kjišhko ga bor kong ga lēbo ère tjwļō drete. ⁸Cristo Jesús, e bor Tjļapga. E miydēr woydē pjļúe. Tjwļō ara anmoyō li e. Lēbo oblē kēs li, e ber bor kong ga tjwļō drete. Cristo kjišhko ga lēbo kēs li, e rayoror pjir, bor kong ga ioror beno tjwļō ame, lēbo dburoy wļeni. Woydēr ara li, e Cristo. ⁹Woydēr ga tja ber baīya. Tja ber pjlo bek Sbō bokso wļo ga woyde ga tja jëk pjlo bek kjok lļgwekkļo tara Moisésdē li go lēme. Woyde ga tja mār Cristo go dey. Eni ga tja ie Sbōrē ber pjlo bek ba bokso. ¹⁰Cristo, e miydēr woydē pjļúe. Cristo woshrra Sbōrē irōng obishko ga ba dbo ara pina bi kong wēlēe. Ba dbo li miydēr woydē bakoe. Cristo shdunaba ara, ga zrōrabae. Woydēr ga tja shdungoba eni bako, ga tja wolōn woydē baīya dik bebi. ¹¹Woydēr eni, lļono ga nopga woshre Sbōrē irōng obishko ga tja woshre ba tjok bako wļo.

¹²Tjļōkwo lōror kēs ère wļenor pjir, e lotē lēme. Tja iara Sbōrē beno pjlo bek tjān, e lotē lēm bakoe. Gueniyo tja jeke. Tja kjrara Cristo Jesúsdē, e miydēr pjļú wļo. E kjišhko ga tja drōn ara, e miydēr wļo. ¹³Pjeyoga, tja öötong tjān, e lotē lēme. Gueniyo tja wotjļino to katōe. Lēye shāryono tjān li, e woyotjļin ame, lēbo wen tjwe li woyotjļintē. ¹⁴Tja tōna Sbōrē beno tjeng Cristo tjok ga tja rokara jem sōk ba tjok iyado wļo, lēbo twe ber bor kong wļo. E kjišhko ga tja drōn ara, kjrēr wļo.

¹⁵Woyde ga shji wotjļik kēkboga dik. Pjāy kjone kjone wotjļik oblē sira wļeni ga pjļú li piya Sbōrē bomi kong, miydēmi wļo. ¹⁶Lēye shāryëy kjone pogo ga woyde ga shji jëk lōng tjļōkwo bek miydoroy tjān li go.

¹⁷Pjeyoga, tja omshāryē shäng sorē ga pjāy omshāryos uunkong eni bakoe. No kjone kjone lōng bomi tjrēko omshāryē lōng pjļú borwatoy dik. Pjāy omshāryos baīya dik bakoe. ¹⁸Tjļōkwo lōror bomi kong ara tjān li, e lēr bomi kong jek pjłara obi, ga tja slār ēēe. Nopga ara omshāryē pjļú lēme. Cristo wolōno pjang kjļōs go li, ba kong ga tjwļō lēme le lōk wļeni. ¹⁹E beno tjeng shdungko iyado wļo. Wotjļik Sbō lēme. Wotjļik lēbo tjeng kjok ère kjing go erōe. Wotjļik lōng lēbo ber pjļú ba doyo kong li shāryayde. Zok ga lēbo owa shāryara li, e kjwe lökyokjre ara, gueniyo eni lēme. Roy shdōya lōk wopjļúe.

²⁰Gueniyo ga shjira kjok ère so ame. Shji iara Sbōrē beno lōng kjok dogo so tjān, lļono ga shji äär ber lōng ba tjok eshko wļo. Bi dōga tjwe

eshko dwayo li koshoydë löng. Tjlapga Cristo Jesús li e. ²¹E dbo ara, llebo tjeng kës li iche ga pjlu wlo. Ga ba dbo go ga bi doyo twlwo lle m ere kjlopswe ber wolëso, baiya dik, e sök kjok dogo doyo sorë ga eni.

4 ¹Era eni ga pjeyoga, pjäy wokjang, pjäy löng Tjlapga Jesús tjok iyado. Pjäy woydër ara. Pjäy in woydë ara. Tja iëmi ber wopjlue. Pjäy beno bor potjwlëkklo wleni, tja parkono Sbö kong ara kjishko.

Pablo lano pjeyoga oblë oblë kjishko

²Walëga tjeng eshko do pjök ko Evodia, Sintique. Rokër ba kong ga tönö beno tjeng Tjlapga Jesús tjok kuzong ga jëk löng wopjlü ëng tjok, epenga dö wleni. ³Pja bor kjlara, ga woydër ga pja ber shäng ba kjimtaga. Epga parkono löng Jesús roy pjlu shdök bor tjok pjlu. Clemente, bi pjeyoga oblë, epga parkono löng bor tjok eni bakoe. Eye ber löng së iyado Sbö tjok wlo ga ba ko, e tak pjang Sbö kjibokwoyo go. Ga pjäy ko tak lök e go bakoe.

⁴Pjäy löng mär Tjlapga Jesús go kuzong ga pjäy ber löng wopjlue. Lër jek obi ga pjäy ber löng wopjlue. ⁵Llebo shäryozï oblë kong yötso, pjäy löng wopjlü oba kong lëba wlo. Tjlapga Jesús, e tjwe döröe. ⁶Shji woydë lle kjy lleme. Pjäy sorëborë ga pjäy syöshtos Sbö kong, «Tjawa kjimtozong» lözi ba kong. Ga pjäy syöshteshko ga «Tjawa wopjlü bop tjok» lözi ba kong eni bakoe. ⁷Eni ga pjäy tönö beno tjeng Cristo Jesús tjok kuzong ga pjäy ie Sbörë ber löng wlëp, pjäy woydë ame wlo. Shji nopga kong ga shärye eni li, e llebo kësbang, e shay uunkong ber tjeng bi kä roy ga äe.

⁸Era eni ga pjeyoga, llebo bek li, e woyotjlizi eröe. Bangkjrako li, bek li, owa lle m li, wolëso li, woydako li, roy pjlu li, e woyotjlimirë. ⁹Lleye loror bomi kong kuromi li, e shäryozï eni. Lleye shäryoror inomi sorë ga pjäy omshäryos eni bakoe. Eni ga pjäy ie Sbörë ber löng wlëpe.

Pablo wopjlü, llebo twara lök ba kong li kjishko

¹⁰Tja kong llebo shäryëmi kjwlë jä. E go ga miydër ga tja woyotjlimi lönge. E kjishko ga tja iara Tjlapga Jesüsdë beno sök wopjlue. Tja woyojeromie lër lleme. Miydër ga tja woyotjlimi löng iyado. Tja kjimtëmi loromi ara, gueniyo tja kjimtëmi ga ä öötong dbar kop ara. ¹¹Lër bomi kong eni, llebo woydër obi kjishko lleme. Tja sorë pogo ga tja oppino sök wopjlue. ¹²Shji lleye dret ga e sorë miydër. Shji llebo ara ga e sorë miydër bakoe. Tja dli arare, de tja pjli ara, tja llebo arare, de tja lleye dret, eshko ga tja oppino sök wopjlü iyado. ¹³Tja kjimte Tjlapga Jesüsdë kjishko ga llebo uunkong eniyo shäryër ga pjlu.

¹⁴Eni gueniyo ga tja songshko ga tja kjimtoromi li, e pjlu. ¹⁵Jesús roy pjlu lër soyër shäng pjäy Filipos sopga kongshko ga tja opshino jek bomi kjokyo Macedonia dwayo. Eshko ga dbur ichoromi bor kjimtoklo. Tjlokwo kragaga shto oblë so lira, tja kjimtara kjlara lleme. E miydoromi tjan. ¹⁶Tja sök Tesalónica kjokyo ëmdë ga dbur ichoromi bor kjimtoklo pjlaraso lleme. ¹⁷Tja wotjlik llebo ichoromi li kjrë erö lleme. Woydër ga pjäy kong llebo twe Sbörë ara e kjishko.

¹⁸ĹlĹbo ichoromi Epafrodito tjok Ĺi, e kĵroror pĵir tĵĵn. E tjok ga   otong woydoror Ĺi kĵinmo, ĹĹye woyd r ame. ĹlĹbo ichoromi Ĺi, e beno Sb  kong pĵl ,    pĵĹ   ,   g zr raba, sho suraba, pĵono dret, ba poshr kk  w eni. ¹⁹Bor Sb , e ĹlĹbo ara. Eni ga ĹĹye woyd mi Ĺi, e twe bomi kong pĵir, pĵ y t no beno tĵeng Cristo Jes s tjok kĵishko. ²⁰Bi Sb , e bi Data. E poshr y, i y ber k sbang, tĵw   ara  yado w o. Ber eni.

Kĵibokwo pĵir  ong

²¹  Yonde?   Ĺ mi Sb  nopga t no beno tĵeng Cristo Jes s tjok    ng Ĺi kong.

Pĵeyoga    ng bor tjok  reshko Ĺi,   Pĵ y yonde?      bomi kong.

²²Jes s tĵ  kwo kĵragaga    ng k s Ĺi,   Pĵ y yonde?      bomi kong.

Tĵ  kwo kĵragaga park     ng pĵ u k sbangyo ushko Ĺi,   Pĵ y yonde?      bomi kong bakoe.

²³Rok r Tĵ lapga Jesucristo kong ga ba wopĵ   Ĺi kĵishko ga pĵ y kĵimte ara. Ber eni.